

DIZRA' BZUAJ SAN PABLO CHEE BI CHEE CRISTO ZAJ ZRE'E XEZRE ÉFESO

Pablo dxugape' diuzre bi chee Cristo zaj zre'e xezre Efeso

¹ Neda', Pablo, naca' gubáz chee Jesucristo lawe' da guca lazre' Dios gaca' caní. Dxuzúaja' da nigá cheele le'e, nácale bi chee Dios, ne dxeajlí lázrele Jesucristo, na' zrale xezre Éfeso. ² D xenaba' lau Xradxu Dios, ne lau Xránad xu Jesucristo gun chawé'e le'e, ne gunne' le'e xel-la dxebeza zri lazre'.

Ca naca da chawe' da dxezí' lu nnad xu ne chee Cristo

³ Dxue lá'anad xu Dios, Xra Xránad xu Jesucristo lawe' da ba bñe' cheed xu ca naca xúguté da chawé'e chee Be' Lá'azxa da zá'aca xabáa lawe' da nácad xu bi chee Cristo. ⁴ Dios guqué'e dxi'u chee gácad xu bi chee Cristo gate quebe ne gunte' xézr la xu, chee gácad xu benne' lá'azxa, ne du lazre' lau Le'. ⁵ Lawe' da bzri'ine' dxi'u, bñe' cheed xu gate nate si' lu ne'e dxi'u ca bi cheé queze' ne chee Jesucristo, cát eze da guca lazre' guné'. ⁶ Chee le na', tu dxue lá'anazquez dxu Dios ne chee xel-la xrlátaje chee' da naca na szrente. Lu xel-la xrlátaje chee' na' gúcalené' dxi'u lawe' da nácad xu tuze nen Zrí'ine', bi nazri'ite lazre'. ⁷ Ne chee Zrí'ine' na' naxá'awene' dxi'u nen dxen cheé queze', na' lu xel-la zri'i lazre'

zren chee' bnite lawe' cheedxu dxi'u ca naca dul-la da nabágadxu. ⁸ Dios nazrí'ile'ene' dxi'u, ne dxunne' dxi'u xel-la sina, ne xel-la dxéajni'i, ⁹ na' bzéajni'iné' dxi'u ca naca da dxaca lazre' da bgache na, da na' lu xel-la zri'i lazre' chee' ba núnquezé' guné' né chee' Cristo. ¹⁰ Nuchague' xúgute' da zaj zua na xabáa, ne xezi la xu, chee' xelú'u na lu na' Cristo, da gusexúzre' guné' gate zrin zra chee' na.

¹¹ Ne chee' Cristo Dios guqué'è dxi'u chee' gate nate, chee' si' lu nnadxu da xáladxu da gunna Le', ca da ba núnquezé Dios, Bénnea' dxune' xúgute' da dxeque Le' xrlátaje. ¹² Caní bene' chee' gácadxu tu da gucá'ana szren na xel-la szren chee', nácadxu dxi'u benne' nedxu dxebeza lázredxu Cristo. ¹³ Cá'anqueze le'e, gate benle dizra' li, da naca na dizra' chawé' chee' da ben Cristo, bselé' le'e. Guxejlí lázrele Le', na' Dios bzue' Be' Lá'azxa lu xichaj lázrdaule ca tu da dxunna bea na nácale bi chee', ca guchébe lazre' guné'. ¹⁴ Be' Lá'azxa na' naque' da dxunna bea na sidxu da xáladxu da gunna Dios dxi'u, gate zrin zra da ba nune' guselé' bi chee' ca', chee' güe lá'anaquezdxu Le' ca naca xel-la szren chee'.

D xenaba Pablo gunezruij Dios xel-la sina chee' bi ca' chee' Cristo

¹⁵ Chee' le' na' gate benda' ca dxeajlí lázrele Cristo, ne ca nazri'ile xúgute' bi ca' chee' Dios, ¹⁶ dxápaqueza' Dios; Xcalenu', ca naca cheele le'e gate dxuchálajlena' Dios, ne dxeajsá lázrqueza' le'e. ¹⁷ D xenaba' Dios chee' Xránadxu Jesucristo, naque' Xradxu zue' xabáa, gunné' le'e xel-la sina lu be' nácaquezle da gulé'e na le'e gúnbea xánnele Le'.

18 D xenaba' lau Dios guzéajni'iné xichaj lázrdaule le'e chee nézele ca naca da dxebeza lázredxu da bláwizre' dxi'u sidxu, ne ca naca xel-la gunní'a chee xel-la szren da gunezruj Dios bi chee ca', **19** ne ca naca xel-la waca zrenté chee' da dxun na zrin lu xichaj lázrdaudxu dxi'u dxeajlí lázredxu Le'. Xel-la waca nigá bchine Dios lu duté xel-la dxenná bea zren chee' **20** gate bsebane' Cristo ládujla benne' gate ca', ne guleche' Le' chalá'a xabela chee' xabáa, **21** ne bzue' Le' chee' nna bé'ene' xúgute' benne' blau xabáa, ne xúgute' benne' dxelenná bea xabáa, ne xúgute' benne' zaj napa xel-la waca, ne xúgute' benne' zaj naca xrane, ne xúgute' da dxelenná bea na lu zra na'a zra, ne lu da za za'. **22** Bzue' xúgute' da zaj zua lu na' Cristo, ne bzue' Le' gaque' benne' xichaje chee' bi chee' ca' ca naca xúgute' da dxelune'. **23** Benne' caní zaj naque' ca bela' dxen chee' Cristo, da dxulé'e na duté ca nácaqueze Le', Bénnea' dxusexuzre' dxucá'ana chawé' ca naca xúgute' da zaj zua.

2

Naca bandxu lawe' da nazrí'i Dios dxi'u

1 Gate nate gúcale ca benne' gate lu xichaj lázrdaule ne chee' da calela ca', ne dul-la ca' **2** da bénle gate ne dxunle ca dxelún bénneache zaj zre'e xezr la xu nigá, benne' dxelune' ca dxenná da xriwe', be' na' da dxenná bea na lu be', ne dxun na zrin lu xichaj lázrdau benne' ca' quebe dxuluzué' dizra' chee' Dios. **3** Cá'anqueze dxi'u, xúgutédxu bëndxu caní gate nate, gate bëndxu cátexe da guzá lázredxu, ne bëndxu ca da gunná bela' dxen chee'dxu, ne ca da gunná xichaj lázrdaudxu. Chee'

le na' guca na cheędxu sidxu da zi' da xa' cheę Dios ca gunę' cheę xezıcadxa benne' ca', ⁴ san Dios bexache lázrele'ę dxi'u, ne bzrı'ile'ęne' dxi'u, ⁵ na' bennę' dxi'u xel-la nabán tu zren nen Cristo gate ne nátedxu lu xichaj lázrdaudxu nę cheę dul-la da nabágadxu. Naladxu nę cheę xel-la xrlátaje cheę Dios. ⁶ Cá'anqueze bsebán Dios dxi'u tu zren nen Jesucristo, ne gulechę' dxi'u tu zren nen Lę' xabáa. ⁷ Bene' caní cheę gulé'ęne' lu zra da za za' ca nazrı'ile'ęne' dxi'u, ne ca naca da cháwele'ę bene' cheędxu nę cheę Jesucristo. ⁸ Lu xel-la xrlátaje cheę Dios bselę' le'e lawe' da guxejlí lázrele Cristo. Quebe naca na nę cheę bi da bęnle le'e, san naca na tu da bęn Dios cá'aze nę cheęle. ⁹ Quebe nalá nu benne' nę cheę bi da dxúnquezę', cheę quebe nu benne' gucá'ana szren cuine'. ¹⁰ Dios bęne' dxi'u, na' bexune' dxi'u tuze nen Jesucristo cheę gundxu da xrlátaje ca' da ba nun Lę' gundxu gate nate.

Nácadxu tuze nę cheę Cristo

¹¹ Le gusá lázrele ca gúcale le'e gate nate. Quebe nácale benne' judío, benne' ca' dxelechugue' lu bella' dxen cheę' da na' dxulé'e na zaj nababe' cheę Dios, ne zaj nazí le' benne' zaj nadxugu, na' dxelennę' cheęle nácale benne' quebe zaj nadxugu. ¹² Lu zra ca' quebe guzúałe Cristo le'e. Quebe bęnle tuze benne' Israel ca', ne quebe bénbeale ca naca xel-la wezría da bęn Dios, ne ca naca da guchębe lazre' Dios. Guzúałe lu xęzr la xu nigá, ne quebe bi guleza lázrele, ne quebe bénbeale Dios. Gate nate guzrale zítu'la naga zua Dios. ¹³ Na'a nę cheę Cristo Dios ba bzue' le'e gágutę lawe' da gute Cristo

waláz chee le. ¹⁴ L  queze Cristo benne' dxi'u xel-la dxebeza zri lazre', ne bexune' dxi'u tuze, netu', benne' jud  o ca', ne le'e, benne' quebe zaj naque' jud  o, ne bzria xi'   xel-la dxezr  a da b  n na dxi'u chupa la'a, da guca na ca tu ze'e. ¹⁵ Gate gute Jes  s wal  z che  dxu guchugu  ' da nadxixruj bea na da naca na da gunn   Dios gundxu, ne da ca' dxelenn   bea na, na' bexune' dx  pate xezre ca' tuze xezre cube da nababa na chee'. Can   gud  xruje' xel-la dxebeza zri lazre' che  dxu. ¹⁶ Can   guca n   chee' xel-la gute chee' Cristo le'e xaga b  guaj, guchugu  ' naze xel-la dxezr  a ljwezre chee' dx  pate xezr ca', na' bexune' dx  pate tuze b  l-la' dxen, ne bexune' le' tuze nen Dios.

¹⁷ Bla' Cristo, ne bzenne' le'e dizra' chaw  ' chee', le'e quebe n  cale jud  o, na' guzrale zitu' naga zua Dios, ne le'e n  cale jud  o, na' guzrale gagu naga zua Dios, ¹⁸ na' n   chee' Cristo, x  gute  dxu, benne' jud  o ca', ne benne' quebe zaj naque' jud  o, dxebigad xu lau Xradxu Dios n   chee' Be' L  azxa. ¹⁹ Chee' le' na' le'e, benne' quebe n  cale jud  o, qu  bedxa n  cale ca' benne' zitu' tu lu x  zr la xu da quebe naca na chee le, san n  cale benne' walazre' ca' x  gute' benne' ca' zaj nababa chee' Dios. Nab  bale Zri'ine Dios. ²⁰ N  cale ca tu xu'u zren da zria na lawe' lane da gulixruj benne' gub  z ca' chee' Cristo, ne benne' ca' buluch  laje' wal  z chee' Dios, na' Jesucristo n  aqueze' xiaj blau chee' lane xu'u na'. ²¹ Lawe' lane nig   da naca Cristo, dut   xu'u na' dxegula na tu li chee' gaca na tu xudau' l  azxa chee' Xr  nadxu. ²² C  anqueze le'e, lawe' da n  cale Cristo tuze, xu'ule lu xu'u na' naga zua Dios n   chee' Be' L  azxa chee'.

3

Pablo dxuzenne' benne' quebe zaj naque' judío dizra' chawe'

¹ Cheē le na' neda', Pablo, dxuzú zriba' lau Dios. Xu'a lizre xia lawe' da dxuna' zrin cheē Jesucristo cheē gaca chawe' cheele le'e, quebe nácale judío. ² Ba nézele ca bén Dios lu xel-la xrlátaje cheē, bsebague' neda' guchálaja' dizra' chawe' cheē Cristo ládujla le'e. ³ Lu da ble'e Dios neda' bzéajni'iné' neda' tu da nagache cheē ca da bzuaja' cheele nedxu. ⁴ Gate gulábale na weque bé'equezle núnbe'a da nagache ca naca cheē Cristo. ⁵ Guca na tu da nagache gate nate. Dios quebe bzéajni'iné' na bénneache, san na'a ne cheē Be' Lá'azxa cheē ba blé'ené' na benne' gubáz lá'azxa ca', na' benne' ca' dxuluchálaje' waláz cheē. ⁶ Caní naca da nagache na': Ne cheē dizra' chawe' cheē Cristo benne' quebe zaj naque' judío welezí'queze' da gunezruij Dios le' ca da xelezí' benne' judío ca', ne zaj naque' tuze bel-la' dxen, ne xelezí'queze' tu zren da nachebe lazre' Dios ne cheē Jesucristo.

⁷ Dios benné' neda' wen zrin cheē dizra' chawe' na' ne cheē tu da bénnazé' neda', bchínene' xel-la waca zren cheē'. ⁸ Neda' nácadxa' benne' baxáche ca xúgute benne' zaj naca bi cheē Dios. Bene' neda' tu culuén zren cheē guzenda' benne' quebe zaj naque' judío dizra' chawe' ca naca xel-la gunní'a zrenté cheē Cristo. ⁹ Bsebague' neda' guzéajni'ida' xúgute bénneache ca da nun Dios guné' da bgache gate nate, na' naca Dios Bénnea' benné' xúgute da zaj zua, ¹⁰ cheē xelúnbea na'a benne' dxelenná be'e, ne zaj nape' xel-la szren xabáa ca naca xel-la sina zrenté cheē Dios. Xelúnbe'e na ne cheē benne' ca'

zaj naca bi chee^q Cristo. ¹¹ Da nigá b^en Dios ca da nun^e' gate nate gusexuzre' ne chee^q Xránadxu Jesucristo. ¹² Ne chee^q Cristo waca bígad xu lau Dios du lázred xu, ne dut^e xel-la dxuxré n lazre' chee^q dxu lawe' da dxeajlí lázred xu Le'. ¹³ Chee^q le na' dxata' xúeda' le'e quebe gate ni'a na'le lawe' da dxedéa' xel-la zi' ne chee^q le'e. Xel-la zi' da dxedéa' neda' gaca na chee^q tu da ba neza.

Xel-la zri'i lazre' chee^q Cristo

¹⁴ Chee^q le na' dxuzú zriba' lau Xra Xránadxu Jesucristo, ¹⁵ Bénnea' dxuzú^e la cha chee^q benne' zaj zre'^e xabáa, ne xezr la xu. ¹⁶ D xenaba' lau Xrad xu, ca naca xel-la gunní'a zrent^e chee^q guzé tipe' le'e nen xel-la waca chee^q lu xichaj lázrd aule ne chee^q Be' Lá'azxa chee^q, ¹⁷ chee^q sua Cristo lázrd aule ne chee^q xel-la dxeajlí lazre' chee^q, ne se cháchale lu xel-la zri'i lazre', ca tu xaga da nudé lue na sítuja, ¹⁸ chee^q seque' chéajni'ile tu zren nen xúgute bi chee^q ca nazriluj, ne ca natunna, ne ca na-situj, ne ca nasibe xel-la zri'i lazre' chee^q Cristo. ¹⁹ D xenaba' lau Dios gúnbeale xel-la zri'i lazre' na', lácal a cabata' séqued xu gúnbead xu dut^e ca naca na. Caní d xenaba' Le' chee^q suale le'e dut^e da náca queze Dios.

²⁰ Na'a, gaca báqueze Dios, Bénnea' nape' xel-la waca gúnle' equeze' da zrendxa ca da dxenábad xu, u ca da dxéqued xu, ne chee^q xel-la waca chee^q da dxun na zrin lu xichaj lázrd aud xu. ²¹ Gaca ba Dios ládujla benne' zaj naque' bi chee^q Cristo ne chee^q Jesucristo xúgute iz a chadía chacanna. ¡Ca'an gaca na!

4

Nácadxu tuze ne chee Be' Lá'azxa

¹ Cheē le na' dxata' xúeda' le'e, neda', xu'a lizre xia lawé' da dxuna' zrin cheē Xránadxu, cheē gunle da xrlátaje ca dxal-la' xelún bénneache ba gucá'a Dios le', ca gucá'aqueze' le'e. ² Le gaca dxexruj lazre', ne zri'i lazre'. Le cueza lazre', ne le cue' gunne xue cheē tule xetule lu xel-la zri'i lazre' cheele. ³ Le gun ba xuzre gácaquezle tuze, guchínele xel-la waca cheē Be' Lá'azxa lu xel-la dxebeza zri lazre' da na' dxun na le'e tuze.

⁴ Tuze naca bela' dxen chee Cristo da nácadxu. Tuze naca Be' Lá'azxa, Nu na' zúalene' tu tudxu. Tuze da dxuxrén lázredxu, da na' sidxu lu na' Dios.

⁵ Tuze Bénnea' naquē Xránadxu.

Tuze da dxeajlí lázredxu.

Tuze ca dxedxúadxu nisa.

⁶ Tuze Bénnea' naquē Dios, ne Xra xúgutédxu.

Le' naquē Benne' xíchaje xúgutédxu.

Dxulé'e cuinē lu da dxundxu xúgutédxu.

Zúaquezē lu xichaj lázrdau xúgutédxu.

⁷ Tu tudxu nasidxu tu xel-la waca cha cheédxu
ca da nunna Cristo dxi'u.

⁸ Naca na ca naxúaj na lu dizra' lá'azxa, dxenná na:

Begüéne' xabáa, gate gudé bzétaje' benne'
guledábaguē Le'.

Na' bnézrujē bénneache xel-la waca ca'.

⁹ ¿Bi zéaje na, dxenná na: Begüenē? Zéaje na nédxula bétajē lu xézr la xu nigá. ¹⁰ Bénnea' bétajē nácaquezē Bénnea' begüénē lu da blaudxa lu xabáa cheē gaca bea na xu'u lu ne'e xúgute da de, ¹¹ na' benne' cha cheédxu xel-la waca cheē:

Gaca bál-ladxu benne' gubáz cheē'.

Gaca guzendxu xezícadxu bénneache dizra' chawe' chee'.

Gácadxu xezícadxu benne' dxuxúedxu bi chee' ca'. Na' gusédedxu-be' xezícadxu.

12 Ca'an bëne' chee' bpa'adxe' bi chee' ca' chee' xelunbe' zrin xulucá'anabe' xrlátaje bénneache ca' zaj naque' zruza ni'a na' Cristo:

13 Chee' gácadxu tuze ca dxéajlèdxu, ne ca núnbreadxu Zri'ine Dios, chee' gácadxu benne' du lazre', chee' gácadxu cátēze nácaqueze Cristo.

14 Caní nacan chee' québedxa gácadxu ca bidu ca', bi ca' dxelezibe' bítetēze dizra' da zaj naca na ca tu be' da zeaj na nila na'la, ne québedxa güedxu lataj xelún zréaje benne' wën da zrinnaj ca' dxi'u, chee' quebe xelezí xe'e dxi'u chee' gundxu da calela. **15** Lu xel-la zri'i lazre' dxal-la' guchálajdxu da li chee' gácadxu cátēze nácaqueze Cristo, Bénnea' naque' xichaj bel-la' dxen da nácadxu dxi'u. **16** Le' dxune' tuze xúgute ni'a na' zaj zria bel-la' dxen chee' chee' gaca na tu bel-la' dxen nazá'atē chee' na, ne chee' xelún zrin xúgute ni'a na' ca' chee' gula bel-la' dxen na', ne gaca na chawe' lu xel-la zri'i lazre'.

Xel-la nabán cube da dxunna Cristo dxi'u

17 Da nigá dxapa' le'e, ne dxusebaga' le'e waláz chee' Xránadxu chee' québedxa gunle ca dxelún bénneache quebe zaj núnbe'e Dios, benne' ca' dxelune' cátēze dxeléquen'e xrlátaje, **18** benne' ca' zaj nachul-la xichaj lázrdawē'. Benne' caní quebe zaj nape' xel-la nabán li lazre' da dxunna Dios bénneache:

Zaj nachul-la nanítene', ne zaj naca zide' lázrdawē'.

19 Québedxa dxelexedué'ene'.

Belezanne cuine' dxelune' da schanni'.

Du lazre' dxelune' xúgutę da sban.

²⁰ Quegá caní nazédele le'e cheē Cristo, ²¹ che da li xca' bénnele da dxuchalaj Lē', ne nusédene' le'e ca naca da li da zúale Jesús. ²² Ca naca da bənle nédxula, le guzúa chalá'ala da gúcale lawe' da guzrínnaile lu da sban da guzá lázrele.

²³ Dxal-la' gácale benne' cube lu xichaj lázrdaule.

²⁴ Dxal-la' gunle da naca cheē benne' cube na' da bən Dios le'e

cheē gunle da naca na xlátaje, ne da li da naca na lá'azxa.

²⁵ Cheē le na' québedxa gun lázrele.

Le nn̄e da li tule xetule lawe' da nácadxu ni'a na' tuze

bel-la' dxen cheē Cristo.

²⁶ Che dxezrá'ale, quebe dxal-la' gunle dul-la, ne quebe zrá'ale scha'.

²⁷ Quebe güele da xriwe' lataj guchixre cheē na le'e.

²⁸ Bénnea' guque' gubán québedxa dxal-la' cuane'.

Dxal-la' gunę' tu zrin chawe' nen ni'a ná'queze' cheē gape' da gunézruje' benne' dxelexázrjene'.

²⁹ Quebe nn̄ele dizra' calela. Le guchalaj da naca na xrlátaje cheē xelezé tipa benne' xelenne', ne xelezí'ę na ba neza. ³⁰ Quebe guzúa xáchele Be' Lá'azxa cheē Dios, lawe' da zúale Be' le'e cheē gaca bea na nácale bi cheē Dios ca zrindxa zra xezí' lu ne'e dxi'u.

³¹ Le guzúa chalá'ala:
Xel-la dxe cuide', ne xel-la dxezrá'a, ne xel-la xichaj zra'a,
ne xel-la wetil-la dizra', ne xel-la wechacha, ne xúgutę da zrinnaj.

32 Dxal-la' gácale du lazre', ne xache lázrele tule xetule,
 ne gunite laule chee^q tule xetule ca bén Dios,
 bnite lawe' cheele le'e lawe' da nácale bi chee^q
 Cristo.

5

Ca dxal-la' xelaca bi ca' chee^q Dios

¹ Lawe' da nácale bi cheéqueze Dios, bi nazri'iné', le gun ba xuzre gácale cátēze nácaqueze Le'. ² Le zri'i le sa' lqwézrele tule xetule cátēze ben Cristo, bzri'iné' dxi'u, ne bzanne cuine^q waláz cheédzu ca tu zrília'dau', báedu dxelute benne' lau Dios chee^q xedúa xtul-le'. Gate gute Cristo le'e xaga bégua^j, guca ca tu da dxelá zixre lau Dios da dxelugú'u bénneache lau Le'.

³ Lawe' da nácale bi chee^q Dios, québedxa dxal-la' guchálajle chee^q da dxucá'ana ditaj na bénneache, ne chee^q da sban ca', ne chee^q xel-la wecude' da de^q.

⁴ Quebe guchálajle dizra' schanni', ne dizra' bize, ne dizra' calela, da quebe dxulucá'ana na chawe' bénneache, san dxal-la' xéquezle Dios: "Xcalenu."

⁵ Ba nézquezle quebe chu'u naga dxenná bea Cristo nen Dios netú benne' dxucá'ana dítaje' bénneache, u tu benne' dxune^q da sban, u tu benne' dxucúdie' da de^q, da naca na ca dxucá'ana szrené^q bedau' xiaj xaga. ⁶ Quebe güele lataj nu si xé le'e nen dizra' xala, lawe' da ne^q chee^q da nigá dxesel-la Dios da dxusaca zi na benne' ca' quebe dxuluzúe^q dizra' chee^q. ⁷ Quebe gunle tu zren benne' dxelune^q da caní.

⁸ Nédxute^q guzúale lu da chul-la, na' na'a zrágale xel-la naxaní^q lawe' da nácale bi chee^q Xránadzu.

Cheē le na', le gun da naca na cheē xel-la naxaní',
 9 da na' naca xel-la dxucá'ana chawe' ljuwézredxu,
 ne da xlátaje, ne da li. 10 Le gun zi' lázrele nézele
 gunle da dxezaca ba lazre' Xránadxu. 11 Quebe
 gunle tu zren benne' dxelune' da calela, da ca'
 naca cheē da chul-la, san le til-la da ca' 12 lawe'
 da naca na tu da xedué'edxu guchálajzedxu cheē da
 dxelún benne' ca' bagácheze. 13 Gate dxeledxúaj da
 caní lu da chul-la, ne zaj xu'u na lu xel-la naxaní',
 gulé'e lawe' ca zaj naca xúgute da caní, lawe' da
 dxulé'e lawe' xel-la naxaní' xúgute. 14 Ca naca da
 caní dxenná na:

Bebán, lue' dxásiu'.

Bexasa ládujla benne' gate,
 na' gusení' Cristo lu xichaj lazrda'u.

15 Cheē le na', le guxúe xanne' ca da dx-unle. Quebe gunle ca dxelún benne' zaj nachulla nanítene', san le gun ca dxelún benne' zaj naxéajni'ine'. 16 Le guchine chawe' zra caní lawe' da dxácale' da zrinnaj lu zra na'a zra. 17 Quebe gácale benne' xala, san le gun zi' lázrele chéajni'ile da dxaca lazre' Xránadxu gundxu. 18 Quebe súzrele, da na' dxuxrinnaj na bénneache, san du lázrele le si' Be' Lá'azxa. 19 Le guchálajle le sa' ljuwézrele tule xetule nen Salmo ca', ne nen da dxúl-lale, ne nen da du dxúl-lale da dxunna Be' Lá'azxa le'e. 20 Du lázrele le gul-la, ne le güe lá'ana Xránadxu. 21 Le xéqueze Xradxu Dios: "Xcalenu", cheē xúgute lu La Xránadxu Jesucristo.

Ca dxal-la' xelún bi cheē Cristo nen lwézrebe'

21 Le gaca dxexruj lazre' tule xetule, ne le gapa ba lá'ana Dios.

22 Nu'ula dxal-la' gaque' dxexruj lazre' lau benne' chee', cátēze dxal-la' gaque' lau Xránadxu, **23** lawe' da naca benne' biu xíchaje chee zru'ule', cátēze naca Cristo xíchaje chee bi chee' ca'. Cristo naque' Benne' weselá chee bi chee' ca', bi zaj naca be' ca bel-la' dxen cheéqueze'. **24** Cátēze zaj naca dxexruj lazre' bi chee' ca' lau Cristo, cá'anqueze nu'ula dxal-la' gaque' dxexruj lazre' lau benne' chee' lu xúgute.

25 Benne' biu dxal-la' zrí'iné' zru'ule' cátēze ben Cristo, bzri'iné' bi chee' ca', ne bzánene' xél-la nabán chee' né cheebe'. **26** Caní bene' chee bebéaje'-be' cheéqueze', ne ben chi'e-be' né chee dizra'chee', da guca na ca dxun benne' dxexibe' bi chee' nen nisa, **27** chee guzúe'-be' lau Lé', xelácabe' bi xabáa, ne quebe bi da sban zaj nápabe', ne netú da zrinnaj, ne netú da naca na ca da ca', san xelácabe' lá'azxa, ne du lazre'. **28** Cá'anqueze benne' biu dxal-la' zrí'iné' zru'ule' cátēze nazri'iné' bel-la' dxen cheéqueze'. Benne' nazri'iné' zru'ule' nazrí'i cuine'. **29** Netú benne' quebe dxequídene' bel-la' dxen cheéqueze', san dxugawé' na, ne dxuxúe' na, ca dxúnqueze Cristo chee bi chee' ca' **30** lawe' da zaj nácabe' ca bel-la' dxen cheéqueze', na' dxi'u nácadxu ca ni'a na' bel-la' dxen chee', ne nácadxu ca bela' dxen chee', né zrita chee'. **31** Chee le' na' tu benne' biu dxal-la' gusane' xra xrne'e chee gaque' tuze nen zru'ule', na' dxúpate' xelaque' ca tuze benne'. **32** Da nigá naca na tu da zren da nagache, na' dxennia' da caní ca naca chee Cristo nen bi chee' ca'. **33** Cá'anqueze tu tule le'e dxal-la' zri'ile zrú'ulale cátēze nazrí'i cuínale, na' nu'ula dxal-la' gape' ba lá'ana benne' chee'.

6

¹ Le'e, bi cuide', lawe' da nácale bi chee Xránadxu, dxal-la' guzúale dizra' xruze xrna chee, da naca na xlátaje. ² Da nadxixruj bea nedxu da zraga na tu da guchébe lazre' Dios naca na da dxenná na: Gudapa ba lá'ana xra xrna'u, ³ chee gaca chawé' chiu', ne chee su' scha' lu xezr la xu.

⁴ Le'e, xruze xrna', quebe guchá'ale zrí'inele. Le gusegula-be' lu xel-la dxenná bea chee Xránadxu, ne le gusina-be' da naca chee Le'.

⁵ Le'e, benne' nada'u, le guzúa dizra' chee benne' zaj naque' xránale lu xezr la xu nigá, ne le gapa le' ba lá'ana, ne le zrebe le', ne du lázrele le gaca chee', cátēze dxuzúale dizra' chee Cristo. ⁶ Le gun zrin chee xránale ca', quegaze gate dxelenná'te' le'e, ca dxelún benne' ca' dxelaca lazre' xelezaca ba lazre' bénneache chee'. Le gun zrin na' cátēze dxunle zrin chee Cristo, gunle du lázrele da dxaca lazre' Dios.

⁷ Le gun zrin chee xránale du lázrele, cátēze dxunle zrin chee Xránadxu, ne quegaze chee bénneache.

⁸ Ba nézquezle tu tu benne', benne' nada'u, ne benne' quebe nada'u, wazi'e lu na' Xránadxu ca naca da xrlátaje da nune'.

⁹ Le'e, xrana benne' ca', cá'anqueze le gun le'e nen benne' wen zrin chee ca', ne quebe guzálajle le' lawe' da nézele zua Bénnea' xabáa naque' Xrana benne' ca', ne Xránale le'e, na' Le' quebe dxebéaje' cha chee bénneache.

Zra lana bi chee Cristo da dxácale lebe' lu wedil-la

¹⁰ Na'a, bi bícha'dau', le gaca chuchu ne chee Xránadxu nen xel-la wala zren chee'. ¹¹ Le gaca ca benne' zjaque' wedil-la zaj nácué' zra lane' xia

da na' dxunna Dios le'e, chee_g gaca se chúchule lau xúgute da dxuzé da xriwe' laule chee_g si xé na le'e. ¹² Quegá dxedíl-laledxu bénneache zaj naque' bela' dxen. Dxedíl-laledxu xel-la dxenná bea chee_g da xriwe' da dxeledá na lu be', ne dxedíl-laledxu be' xriwe' ca', da dxelenná bea na, ne be' xriwe' ca' dxé na ljwezre ca' da xelún na, ne be' xriwe' ca' xu'u lu na' na xezr la xu chul-la nigá. ¹³ Chee_g le na', le gaca ca benne' zjaque' wedil-la zaj nacue' zra lane' xia da dxunna Dios le'e, chee_g séquele súale wedil-la lu zra che da xriwe', na' ca te na' xegá'ana chúchule. ¹⁴ Le se chuchu xca', suale le'e da li ca tu bazxu da nacá'a na le'ele, ne suale le'e da xlátaje ca tu xia da da' lachu'le. ¹⁵ Le gaca sina chee_g guchálajle dizra' chawe' chee_g xel-la dxebeza zri lazre', da gaca na chee_g ca tu cue' zrélate. ¹⁶ Da dxun na ba xen, le gapa xel-la dxeajlí lazre', da gaca na chee_g ca tu da xegapa na, da xusula na xúgute da zaj nalá na zaj zua na xi' da dxuzala da xriwe'. ¹⁷ Xel-la weselá gaca na chee_g ca tu lapa xia da gucache xíchajle, na' xrtizra Dios gaca na chee_g ca tu xia da gunna Be' Lá'azxa le'e. ¹⁸ Gate ne dxunle da caní dxal-la' guchálajlele Dios, gata' xúele, ne nábale lau Le' ne chee_g Be' Lá'azxa. Chee_g gaca gunle da caní dxal-la' súale ban lazre', ne quebe gate ni'a na'le, na' nábale Dios chee_g gácalené' xúgute bi chee_g ca'. ¹⁹ Cá'anqueze le naba Le' waláz chia' neda' chee_g gunné' neda' dizra' da guchálaja', chee_g xazrda' guzenda' bénneache dizra' chawe' chee_g'. ²⁰ Dios bëne' neda' gubáz chee_g dizra' chawe' chee_g', na' chee_g le na' xu'a lizre xia na'a. Le naba Le' gácalené' neda' chee_g xazrda' guchálaja' dizra' chawe' chee_g ca dxal-la' guna'.

Pablo dxugape' diuzre le sa' ljwezre'

²¹ Tíquico, bi bíchedxu nazri'itę lazrdxu, bi li lazre' lu zrin chee Xránadxu, guzenbe' le'e da dxaca chia' nigá, ne da dxuna'. ²² Chee lę na' dxusel-la-be' lau le'e chee guzenbe' le'e ca zúantu', ne chee gutípabe' lázrele.

²³ D xenaba' lau Xradxu Dios, ne lau Xránadxu Jesucristo gunézruje' bi bíchedxu ca' zaj zre'ę na' xella dxebeza zri lazre', ne xel-la zri'i lazre', ne xel-la dxeajlí lazre', ²⁴ na' gunę' chawe' xúgutę benne' ca' du lazre' zaj nazri'inę' Xránadxu Jesucristo. Ca'an gaca na.

**Xela wezria cube nen salmo ca'
New Testament and Psalms in Zapotec, Tabaa
(MX:zat:Zapotec, Tabaa)**

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

Copyright Information

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament and Psalms

in Zapotec, Tabaa

© 1981, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
80626b72-93df-58ae-9f5e-9d86733fab46